


Mañan na BNA su sede Arubiana

Acto conmemorativo dedica na “Tula” lo yuda conscientisa nos pueblo riba sclavitud moderno



Docente di IPA, sr. Mirto Lacle.

ORANJESTAD - Diamars awor dia 25 di october pa 7'or y mei na Biblioteca Nacional Aruba (BNA) su sede Arubiana na Bachstraat 5, lo tin un biaha mas e honor di realisa un dia conmemorativo di e persona historico Tula.

E persona di Tula ta reconoci for di aña pasa como e heroe nacional na Corsou. El a nace 17 di augustus y el a keda decapita dia 3 di october 1795. Sr. Mirto Lacle di Instituto Pedagógico Arubano (IPA) durante un entrevista cu BON DIA Aruba a bisa cu Tula tabata un persona “sclavisa”, y el a aclaria cu e termino “catibo” cu tin biaha ta ser uza, ta uno eroneo. Sclavitud ta ora hende ta explota hende. Ya cu ningun momento Tula tabata catibo, y el a splica cu e Africanonan transporta pa Caribe for di Costa Africano, tabata hendenan cu tabatin su propio dignidad, pero nan a keda practicamente “secuestra y obliga contra nan boluntad” pa bin pa nos continente.

Aña pasa nan a invita e autor di e buki “Slavery and Resistance in Curaçao”,

caminda Charles do Rego tabata e orador special kende a duna un charla magistral. E topico di sclavitud moderno tambe ta hayando un gran magnitud. E siman aki na Aruba a tuma luga un conferencia riba traficaion di hende, entre nan hende muhe cu ta ser explota te hasta sexualmente. Segun e docente Mirto Lacle, e explotacion aki tambe ta un forma di sclavitud, aunke esaki a ser aboli na aña 1863.

Den e cuadro aki pa conscientisa nos pueblo pa muestra nan pa ta critico y pa defende nan dignidad di no laga hende explota nan, ta trece e topico aki mañan 25 di october na Biblioteca Nacional Aruba su sede Arubiana. E ta un programa cu ta conta cu representantenan di nos hermana isla Corsou

E aña aki Jeanne Henriquez directora di e Museo Tula di Corsou, lo ta e orador special cu seguramente lo duna un charla magistral. Otro persona di Corsou, un culturista cu a gana diferente festival di Tumba na Corsou, esta Harry Zimmermann cu tin compo-

sion di “Tula” cu el a gana festival cune, lo participa den e conferencia di mañan. E lo comparti hunto cu otro orguyo nacional di Aruba y integrante di Trio Azteca, Eddy Toppenberg y Jose Henriquez Escalona, caminda nan lo deleita tur esnan presente den e acto conmemorativo dedica na Tula diamars awor.

Tambe tin un programa masha atractivo e mesun anochi aki, ya cu lo tin otro

orador cu lo lansa su buki den persona di Mariska Hammerstein, kende ta un persona invita pa e Festival di Buki pa Mucha. E ta un autor Hulandes cu a yega di skirbi riba un serie di heroe historico, y e biaha aki el a dedica uno na Tula.

Pues e anochi aki lo priminti di ta uno hopi interesante y valioso, segun e docente sr. Mirto Lacle. Tambe e anochi special aki lo conta cu presencia di sra. Olga Or-

man cariñosamente yama “Oshi” cu a aporta na cultura y Papiamentu di Aruba como autor y como maestra. Sra. Orman como miembro di Simia Literario di Hulanda lo declama algun poema relaciona cu “Tula” entre otro di Alida Kock. Lacle kende ta gestor cultural di e actividad aki ta masha agradecido na tur esnan cu a contribui pa e conmemoracion na Tula lo por a bira un realidad diamars awor. □